

Evening Dogri (NSD) Bulletin 01-10-2024

आकाशवाणी

खबरां -----

1 भारत दे प्रधानमंत्री नरेंद्र मोदी होरें जमैका दे प्रधानमंत्री Andrew Holness हुंदे कन्नै शिष्टमंडल सतह दी गल्लबात कीती।

2 जम्मू-कश्मीर च अज्ज मतदान रमानदारी कन्नै सम्पन्न होआ। विधानसभा चुनाएं दे त्रीए ते अखीरले गेड़ लेई संझा 5 बजे तगर 65 फीसदी मतदान दर्ज कीता गेआ।

3 भारत रक्षा क्षेत्र च आत्मनिर्भरता दी बक्खी अगगे बदा'रदा ऐ, आखेआ रक्षा मंत्री राजनाथ सिंह होरें।

4 केरल दे राज्यपाल आरिफर मोहम्मद खान होरें आखेआ ऐ जे ओह राज्य सरकार थमां सुन्ना तस्करें खलाफ कीती गेदी कार्रवाई बारै रिपोर्ट मंगगन।

5 दुए टेस्ट मैच च भारत नै बंगलादेश गी 7 विकटें कन्ने हराई दिता।

<><><><><><>

PM-Modi

भारत ते जमैका नै अज्ज डिजिटल इंफ्रास्ट्रक्चर, सांस्कृतिक आदान-प्रदान ते खेड्डें दे क्षेत्र च सहयोग सबरंधी समझौता-पत्रें पर दस्तखत करिए इक्क दुए गी सौंपे। प्रधानमंत्री नरेंद्र मोदी ते भारत दे दौरे पर आए दे जमैका दे प्रधानमंत्री डाक्टर एंड्र्यू हॉलनेस हुंदे बश्कार नमीं दिल्ली च शिष्टमंडल सतह दी गल्लबात दे बाद समझौता पत्रें दा आदान-प्रदान कीता गेआ। प्रधानमंत्री नरेंद्र मोदी होरें इक सांझे प्रेस बयान च आखेआ जे डॉ. हॉलनेस अपनी पैहली दपक्खी यात्रा पर भारत आए न ते भारत उंदी यात्रा गी विशेष महत्व दिंदा ऐ। उनें आखेआ जे भारत ते जमैका दे सरबंध सांझा इतिहास लोकतांत्रिक कदरां दौनें देशें दे लोकें बश्कार मजबूत सरबंधें पर आधारित न। प्रधानमंत्री होरें आखेआ जे भारत डिजिटल

पब्लिक इंफ्रास्ट्रक्चर, लघु उद्योग, जैव ईंधन, शिक्षा, सेहत ते कृषि दे क्षेत्र च अपने अनुभव जमैका कन्नै सांझा करने लेई तैयार ऐ। उनें आखेआ जे आतंकवाद ते मादक पदार्थे दी तस्करी इक सांझी चुनौती ऐ ते एहदे कन्नै असेंगी मिलियै निब्बड़ना पौना ऐ। मोदी होंरे आखेआ जे दौनें पक्ष वैश्विक शांति ते स्थिरता बनाई रखने लेई अपने प्रयास जारी रक्खडन। उनें आखेआ जे भारत नै करीब 2 दहाके पैहले शा गे दोस्ती दा हत्थ अग्गे बदाया हा ते भारत नै सेहत, शिक्षा, सूचना प्रौद्योगिकी ते बक्ख-बक्ख क्षेत्रे दे विकास च जोगदान दिता ऐ।

<><><><><><><>

JK Voter turnout

जम्मू कश्मीर च अज्ज विधानसभा चुनाएं दे त्रिए ते अखीरले गेड लेई अज्ज वोट पाए गए। जम्मू कश्मीर दिए 40 विधानसभा सीटें लेई अज्ज मतदान होआ। मैदान च कुल 415 मेदवार न। मतदाताएं दी सहूलत लेई कुल 5 हजार 60

मतदान केन्द्र बनाए गेदे हे। मतदान लेई सुरक्षा दे लोडचदे बंदोबस्त कीते गेद हे। जम्मू खिते दे जिनें जिलें दिए विधानसबा सीटें लेई वोट पाए गए उन्दे च जम्मू, कठुआ, उधमपुर ते साम्बा शामिल न ते कश्मीर घाटी दे जिनें जिलें च मतदान होआ उन्दे च कुपवाडा, बारामुला ते बांडीपोरा शामिल ऐ। हासिल आंकडे मूजब संग्रा 5 बजे तगर जम्मू कश्मीर कुल 65 अशारिया 4-8 प्रतिशत मतदान दर्ज कीता गेआ जिस्सले कि जम्मू खिते च 73 अशारिया 274 फीसद मतदान होआ।

Udhampur West च 73.2%, Udhampur East च 74.07%, Ramnagar च 70.3-8%, Chenani च 73.79%, Bani च 71.2-4%, Billawar च 69.6-4%, Basohli च 67.24%, Jasrota च 71.7-9%, Kathua च 71.49%, Hiranagar च 71.18%, Ramgarh च 73.1%, Samba च 71.16%, Vijaypur च 73.05%, Bishnah च 72.75%, Suchetgarh च 68.02%, R.S Pura Jammu South च 61.65%, Bahu च

57.07%, Jammu East च 60.21%, Nagrota च 72.94%,
Jammu West 56.31%, Jammu North च 60.79%, Marh च
76.1%, Akhnoor च 76.28% ते Chhamb च 77.35 फीसद
मतदान दर्ज कीता गेआ।

<><><><><><><>

Women Candidates

जम्मू-कश्मीर च अज्ज त्रीये गेड़ दे चुनां लेई 28 महिला
मेदवार चुनांस मैदान च न। इंदे चा 14 महिलां मेदवार जम्मू
संभाग ते 14 गै कश्मीर घाटी थमां न। जम्मू संभाग दिएं इनें
महिला मेदवारें च रामनगर थमां पैथर्स पार्टी दिआं अशरी देवी,
बनी थमां कांग्रेस दिआं काजल, कठुआ थमां आजाद मेदवार
खुशबू भगत, जम्मू नार्थ थमां सुनीता तुर्की, सुचेतगढ़ थमां
उशा देवी, आर.एस. पुरा जम्मू साउथ थमां पवनीत कौर,
चनैनी थमां गीता मन्हास, सुचेतगढ़ थमां डाक्टर प्रीति
कुमारी, जम्मू वेस्ट थमां शिखा बन्द्राल, उधमपुर वेस्ट थमां

सुलक्षणा खजूरिया, सांबा थमां रीना चौधरी ते जम्मू नार्थ
थमां प्रियंका शर्मा शामिल न।

<><><><><><><>

Valmiki

जम्मू-कश्मीर च असैम्बली चुनाएं च पैहली बारी वोट पाइयें
वाल्मीकि समाज ते गोरखा समुदाय दे लोकें अंदर मती खुशी
ऐ। इनें समुदायें सने पच्छमी पाकिस्तान दे रिफ्यूजी बी दफा
370 ते 35-ए हटने दे बाद वोट पाने दे हकदार बने न।
पिच्छले 67एं बरें च नेया पैहली बारी ऐ जिसलै वाल्मीकि
समाज ते गोरखा समाज दे लोकें गी वोट पाने ते पेशेवर कोर्सें
तोड़ी पुज्ज दा हक मिलेआ ऐ। हासल आंकड़ें मुजब, जम्मू च
वाल्मीकि परोआरें दे साइंढे 6 जहार लोक ते तकरीबन 900
गोरखा परोआर वोट पाने दे हकदार न ते इनें चुनाएं च इंदी
भूमिका बी बड़ी महत्वै आहली ऐ।

<><><><><><><>

Exit Polls

चुनां आयोग पाससेआ जारी दिशा निर्देशें मूजब सब्बने मीडिया घराने, चुनावी अर्जेसिएं ते लोकें गी एह सूचित कीता जंदा ऐ जे जम्मू कश्मीर च असैंबली चुनाएं कन्नै सरबंधत एग्जिट पोल दे नतीजे दा प्रकाशन जां प्रसारण 5 अक्टूबर गी संजा 6 बजे दे बाद गै कीता जाई सकदा ऐ। इस हुकमै दी उल्लंघना करने आलें दे खलाफ सख्त कनूनी कारवाई कीती जाग। जम्मू कश्मीर दा मुख चुनां दफ्तर, जिला चुनां अधिकारी रिटर्निंग अफसर ते कनून नाफिस करने आली अर्जेसियां इस पूरी प्रक्रिया दी निगरानी करगंन।

<><><><><><>

Rajnath

रक्षा मंत्री राजनाथ सिंह होरें आखेआ ऐ जे देश रक्षा क्षेत्र च आत्मनिर्भरता दी बकखी अग्गे बदा'रदा ऐ ते हून भारत दी गिनतरी दुनिया दे रक्षा निर्यातकें च हुंदी ऐ। रक्षा मंत्री होर नमीं दिल्ली च डिफेंस एकाउंट डिपार्टमेंट दे 277में सलाना

समारोह गी संबोधित करा'रदे हे। उनें मैहकमे दे नमीं तकनीकें गी अपनाने दी बी सराहना कीती। उनें आखेआ जे डिफेंस एकाउंट डिपार्टमेंट दा मकसद स्हाब लेखा च पारदर्शिता आहनना ऐ।

<><><><><><><>

Kerala-Govt.

केरल दे राज्यपाल आरिफ मोहम्मद खान होरें अज्ज आखेआ ऐ जे ओह राज्य सरकार कोलां सुन्ना तस्करें दे खलाफ कीती गेदी कार्रवाई उप्पर रिपोर्ट मंगगन जेहड़े अवैध कमाई दा इस्तेमाल देश विरोधी गतिविधियें लेई करदे नं उनें मुखमंत्री पिनाराई विजयन हुंदे हालिया च इक अखबार गी दित्ते गेदे इंटरव्यू दा हवाला दित्ता जिदे च उनें मल्लपुरम जिले चा गैर कनूनी तौरा पर पैसे दे लैन-देन ते सुन्ने दी बरामदगी गी राज्य विरोधी ते राष्ट्र विरोधी दस्सेया हा ते इनें गतिविधियें गी अंजाम देने लेई इक विशेष अल्पसंख्यक समुदाय गी एहदे कन्नै जोड़ेआ हा। राज्यपाल होरें पलक्कड़ च मीडिया आलें

कन्नै गल्लबात करदे होई दस्सेया जे मामला मता गंभीर ऐ
ते मुखमंत्री होरें गी दोषियें खलाफ सख्त कारवाई करनी
लोड़चदी।



Shivraj Farmer's Union

कृषि ते करसान कल्याण केंद्री मंत्री शिवराज सिंह चौहान होरें
अज्ज करसानें दी समस्याएं दा समाधान करने दी सरकार दी
बचनबद्धता गी दोहराया। नमीं दिल्ली च करसानें दे संगठनें
ते करसानें कन्नै होई दी दुई बैठक दे मगरा मीडिया आलें
कन्नै गल्लबात करदे होई उनें आखेआ जे इस बैइक दरान
उनें खाद दे इस्तेमाल, कीटनाशक ते बीएं दी उपलब्धता बारै
बी चर्चा कीती। आकाशवाणी कन्नै गल्लबात करदे होई
किसान संगठन किसान उन्नयन स्वतंत्रता के संघरक्षक दे
सदस्य आचार्य राम गोपाल दीक्षित होरें आखेआ जे सरकार
दे कन्ने होई दी गल्लबात उपयोगी रेई ऐ। उनें आखेआ जे

मंत्री हों भरोसा दोआया जे सारी समस्याएं दा हल तौलें गै
कीता जाग।

<><><><><><><><>

IAF-Air Show

भारतीय वायु सेना दे तांबरम दे कमांडिंग अफसर एयर
कमोडोर रतिश कुमार हों आखेआ ऐ जे चेन्नई च पैहली
बारी वायु सेना दिवस दा मेगा उत्सव होने जा'रदा ऐ।
एयरफोर्स स्टेशन तांबरम च गल्लबात दरान उनें दस्सेया जे
6 अक्तूबर गी चेन्नई तट उपपर मरीना थमां कोवालम तगर
भारती वायु सेना दी ताकत दा प्रदर्शन कीता जाग। उनें
आखेआ जे वायु सेना दिवस परेड 8 अक्तूबर गी तांबरम
वायु सेना स्टेशन च आयोजित कीती जाग। एयर शो दरान
विमान हवाई करतब दस्संगन जेदे च पराने ते नमें लड़ाकू
विमान ते लड़ाकू हेलीकाप्टर बी शामिल होंगन।

<><><><><><><><>

Sikkim Gandhi Jayanti Eve

गांधी जयंती दे मौके उप्पर पूरे देसै च चला 'रदे "स्वच्छता ही सेवा" अभियान तैहत सिक्किम दे राज्यपाल ओम प्रकाश माथुर होरें गंगटोक च राजभवन च सफाई अभियान दी अगुवाई कीती। उनें स्टाफ क्वार्टस दा मुआयना कीता ते रोजमर्रा दी जिंदगी च स्वच्छता दे महत्व बारै जोर भरेआ। राज्यपाल होरें सब्बनें गी रोज अपने जीवन च साफ-सफाई बनाई रखने लेई आखेआ।

<><><><><><>

Cricket

भारत नै बांग्लादेश गी कानपुर टेसट च 7एं विकेटें कन्ने हराइए दऊं मेचें दी टेस्ट श्रृंखला 2-0 कन्ने अपने नां करी लैती ऐ। टीम इंडिया गी जित लेई 95 रन्ज दा लक्ष्य थहोआ हा जिसी रोहित दी कप्तानी आली टीम नै शड़ी व्रऊं विकेटें दे नुकसान पर हासल करी लैता। विराट कोहली 29 रन्ज ते ऋषभ पंत 4 रन बनाइए नाट आउट रेह। रोहित शर्मा 8,

शुभमन गिल ते यशस्वी जायसवाल 51 रन्ज बनाइए आउट होए। बंग्लादेश दी तरफा मेहदी हसन भिराज नै 2 विकट हासल कीते जिसले जे तैजुल इस्लाम नै भारत दा इक्क खडारी आउट कीता। यशस्वी नै अपनी पारी च 8 चौके 1 छक्का लाया। मैच दे पैहले रोज भारत नै टॉस जितेआ ते बंग्लादेश गी पैहले बल्लेबाजी करने लेई आखेआ। पैहली पारी च मेहमान टीम नै 233 रन्ज बनाए। परते च भारत नै जबरदस्त बल्लेबाजी करदे होई अपनी पैहली पारी 9 विकटें दे नुकसान पर 285 रन्ज बनाइए घोषित करी दिती ते भारत गी 52 रन्ज दी बढ़त हासल होई गई। दुई पारी च बंग्लादेश दी टीम नै 146 रन्ज बनाए ते भारत गी जित लेई 95 रन्ज दी चुनौती दिती जिसी भारत नै बड़े सखल्लें हासल करी लैता।

<><><><><><>

Army-Chief

सेना प्रमुख जनरल उपेंद्र द्विवेदी हों आखेआ ऐ जे चीन कन्नै लगदी अस्सल कब्जा रेखा एल.ए.सी पर स्थिति स्थिर ऐ पर समान्य नेई। नमीं दिल्ली च अज्ज चाणक्य रक्षा संवाद पर सेना प्रमुख हों आखेआ जे भारत मई 2020 च फौजी गतिरोध शुरू होने कोला पैहले अप्रैल 2020 दी स्थिति बहाल करना चाहंदा ऐ। उनें आखेआ जे एहदे च जिमी पर नियंत्रण, वफर जोन ते गश्त सरबंधी जेड़ियां पैहले आलियां स्थितियां हियां, उनें स्थितिं गी बहाल करना शामिल होग। जनरल उदपेंद्र द्विवेदी हों अग्गे आखेआ कि जदूं तगर अस्सल कब्जा रेखा पर पैहले आली स्थिति पूरी चाल्ली बहाल नेई होई जंदी स्थिति गी संवेदनशील गो मन्नेआ जाग। उआं उनें आखेआ जे भारत कुसै बी चाल्ली दे हालात कन्नै निब्बड़ने लेई पूरी चाल्ली तैयार ऐ।

<><><><><><>

Yatra-Registration

जम्मू-कश्मीर च श्री माता वैष्णो देवी जी दी पवित्तर यात्रा पर औने आहले श्रद्धालुएं दे पंजीकरण दी प्रक्रिया गी होर बेहतर बनाने लेई श्री माता वैष्णो देवी श्राइन बोर्ड नै रेलै राएं कटड़ा पुज्जने आले श्रद्धालुएं लेई रेलवे स्टेशन पर गै यात्रा पर्ची कटाने दी सुविधा उपलब्ध कराई ऐ जेड़े मुखै दे बक्ख-बक्ख हिस्से थमां माता दे दर्शनं गितै कटड़ा पुज्जदे न। इस बारे जानकारी दिंदे होई श्राइन बोर्ड दे मुख कार्जकारी अंशुल गर्ग होरें दस्सेया जे इस पैहल दा मकसद बेहतर प्रौद्योगिकी दी मदद कन्नै श्रद्धालुएं गी बेहतर सुविधा उपलब्ध कराना ऐ तां जे उंदी यात्रा रमानदारी ते अरामदायक होई सकै।

<><><><><><>

Navika-Sagar

भारतीय नौसेना नाविका सागर परिक्रमा दे दुए गेड़ तैहत कल्लै थमां समुंद्री रस्तेआ दुनिया दा चक्कर लाने दी अभियान लेई पूरी चाल्ली तैयार ऐ। भारती नौसेना दी

“तारिणी किशती” कल दउं दलेर महिला अधिकारिणं लेफिटनेंट कमांडर दिलना के ते लेफिटनेंट कमांडर रूप ऐ कन्नै इस साहसिक अभियान पर खाना होंगन। दवै अधिकारी 8 म्हीने दी यात्रा दौरान बिजन कुसै बाहरली मदद कन्नै पवन उर्जा दी मदद कन्नै 40 जहार किलोमीटर दा सफर पूरा करंगन।

<><><><><><>